



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 60. redovnoj sjednici, održanoj 11. marta 2020. godine, usvaja

ZAKON O IZMJENAMA I DOPUNAMA ZAKONA O JAVNOM PREDUZEĆU “LUKA BRČKO” BRČKO DISTRIKT BOSNE I HERCEGOVINE

Član 1

(1) U Zakonu o Javnom preduzeću “Luka Brčko” Brčko distrikt Bosne i Hercegovine – prečišćeni tekst (Službeni glasnik Brčko distrikta BiH, broj 6/18) u članu 13 u stavu 1 riječ “gradonačelnik” mijenja se riječima “Komisija za izbor i imenovanje i mandatno-imunitetska komisija Skupštine Distrikta”, te se iza stava 5 dodaje novi stav 6 koji glasi:

“(6) Članovi Upravnog odbora ne mogu biti:

- a) direktori javnih preduzeća,
- b) lica koja su u upravnim odborima drugih javnih preduzeća,
- c) direktor drugog preduzeća koje je osnovano ili je u vlasništvu javnog preduzeća,
- d) lica koja imaju manje kvalifikacije i manje radnog iskustva od rukovodnog organa javnog preduzeća, kojeg biraju,
- e) lica koja su u radnom odnosu u javnom preduzeću,
- f) lica koja su pravosnažnom sudskom presudom osuđivana za vršenje krivičnih djela i lica protiv kojih se vodi krivični postupak, osim krivičnih djela iz oblasti saobraćaja.“

(2) Dosadašnji stavovi 6 i 7 postaju stavovi 7 i 8.

(3) U dosadašnjem stavu 6 u tački a) riječi: “jedna prosječna neto plata zaposlenih u tom javnom preduzeću”, zamjenjuju se riječima: “do iznosa jedne prosječne neto plate isplaćene u Brčko distriktu BiH, za prethodnu godinu.”

Član 2

Član 13a mijenja se i glasi:

“Član 13a

(1) Izbor kandidata za članove Upravnog odbora javnog preduzeća vrši Komisija za izbor i imenovanje i mandatno-imunitetska komisija Skupštine Distrikta.

(2) Komisija iz stava 1 ovog člana raspisuje konkurs za izbor i imenovanje članova Upravnog odbora koji se objavljuje u tri dnevna lista, dostupna na cijeloj teritoriji Bosne i Hercegovine, te zvaničnoj internet stranici Skupštine Distrikta i bit će otvoren 15 (petnaest) dana od dana objavljivanja javnog konkursa.

(3) Članovi Upravnog odbora biraju se na osnovu uslova propisanih članom 13 ovog zakona i profesionalnih sposobnosti, te odražavaju sastav stanovništva Brčko distrikta BiH.

(4) Komisija utvrđuje da li svi kandidati ispunjavaju uslove konkursa, intervjuiše i ocjenjuje kandidate, te utvrđuje rang-listu kandidata koju dostavlja Skupštini Distrikta.

(5) Rok za provođenje postupka izbora članova Upravnog odbora i dostavljanje rang-liste Skupštini Distrikta je 15 dana od dana zatvaranja javnog konkursa.

- (6) Skupština Distrikta imenuje Upravni odbor s rang-liste kandidata koju utvrdi komisija, u roku od 15 dana od dana dostavljanja iste.
- (7) Odluka o imenovanju članova Upravnog odbora javnog preduzeća je konačna i protiv nje se može pokrenuti upravni spor.
- (8) Odluka o imenovanju članova Upravnog odbora javnog preduzeća objavljuje se u Službenom glasniku Brčko distrikta Bosne i Hercegovine.
- (9) Postupak izbora članova Upravnog odbora mora biti okončan prije isteka mandata dotadašnjim članovima Upravnog odbora.”

Član 3

- (1) U članu 15 iza stava 15 dodaje se novi stav 16 koji glasi:

“(16) podnosi osnivaču izvještaj o radu i finansijskom poslovanju javnog preduzeća, najmanje dva puta godišnje;”.

- (2) Dosadašnji stav 16 postaje stav 17.

Član 4

Iza člana 15 dodaje se novi član 15a koji glasi:

“Član 15a

- (1) Osnivač razrješava članove Upravnog odbora, prije isteka perioda na koji su imenovani:
- a) na zahtjev člana,
 - b) ukoliko član više ne ispunjava uslove za članstvo,
 - c) ukoliko član ne izvršava svoje obaveze i dužnosti u skladu sa zakonom, aktom o osnivanju i statutom javnog preduzeća, te drugim važećim propisima,
 - d) ukoliko godišnji poslovni plan javnog preduzeća nije upućen u proceduru u skladu sa zakonom,
 - e) ukoliko osnivač ne usvoji izvještaj o radu i finansijskom poslovanju javnog preduzeća,
 - f) ukoliko osnivač nije dao saglasnost na godišnji poslovni plan.
- (2) U slučaju prestanka članstva u Upravnom odboru, jednog od članova, mandat novoizabranog člana Upravnog odbora traje do isteka mandata svih ostalih članova Upravnog odbora.”

Član 5

U članu 17 stavu 3 iza riječi “javnog preduzeća”, dodaju se riječi „sa svim pripadajućim naknadama”.

Član 6

Član 19 mijenja se i glasi:

“Član 19

- (1) Za direktora može biti imenovano lice koje ima:
- a) državljanstvo Bosne i Hercegovine,
 - b) najmanje visoku stručnu spremu,
 - c) najmanje pet godina radnog iskustva.
- (2) Za direktora ne može biti imenovano lice koje je pravosnažnom sudskom presudom osuđivano za vršenje krivičnih djela i lice protiv kojeg se vodi krivični postupak, osim krivičnih djela iz oblasti saobraćaja.”

Član 7

Iza člana 19 dodaju se novi članovi 19a i 19b koji glase:

“Član 19a

Direktora imenuje Upravni odbor na period od četiri godine, uz mogućnost ponovnog imenovanja, s tim što isto lice ne može biti imenovano više od dva puta uzastopno.

Član 19b

Upravni odbor razrješava direktora s dužnosti, prije isteka perioda na koji je imenovan i to:

- a) na zahtjev direktora,
- b) ukoliko direktor više ne ispunjava uslove za imenovanje,
- c) ukoliko osnivač ne usvoji izvještaj o radu i finansijskom poslovanju javnog preduzeća,
- d) ukoliko su ispunjeni drugi uslovi propisani zakonom, aktom o osnivanju, statutom i drugim važećim aktima javnog preduzeća,
- e) ukoliko direktor ne izvršava obaveze i dužnosti koje su propisane zakonom, aktom o osnivanju ili drugim aktima javnog preduzeća.”

Član 8

(1) U članu 21 stavu 1 iza riječi “izmjene” dodaju se riječi “i dopune”, te se iza stava 1 dodaje novi stav 2 koji glasi:

“(2) Godišnji poslovni plan za narednu kalendarsku godinu, mora biti upućen osnivaču, radi dobijanja saglasnosti, do kraja tekuće kalendarske godine.”

(2) Dosadašnji stavovi 2 i 3, postaju stavovi 3 i 4.

Član 9

U članu 26 iza stava 4 dodaju se novi stavovi 5 i 6 koji glase:

“(5) Svi pravilnici, njihove izmjene i dopune koji regulišu: plate, naknade, topli obrok, dnevnice i druga primanja, donose se uz saglasnost osnivača.

(6) Izmjene i dopune akata iz člana 15 ovog zakona, donose se uz saglasnost osnivača.”

Član 10

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-809/20

Brčko, 11. 3. 2020. godine

**PREDSJEDNIK
SKUPŠTINE BRČKO DISTRIKTA BiH
Esed Kadrić**